

清會典

二百二十二


理藩院

漢書  
九〇八號


漢書門類
九〇八
函架
二二
一六〇

內閣文庫
漢書
九〇八
函架
二二
一六〇

內閣文庫
番號 漢 908
冊數 160(146)
函號 295 10







大清會典卷之二百二十二

理藩院

柔遠清吏司

外藩四十九。比內八旗。至蒙古諸部喇嘛厄魯特喀爾喀。視四十九旗為外。

國家溥柔懷之仁。所及者遠矣。本司專掌其事焉。

喇嘛

順治九年。題准。後黃寺。每歲正月初八日至十五日。集喇嘛班第誦經。凡需用物。俱由該部取給。○十年。給達賴喇嘛

金冊印。○又給厄魯特顧實罕



金冊印。○十四年。題准。每旗各選三人學習湯古忒字義。給教習人六品俸。○又題准。京城設四扎薩克喇嘛。

盛京西勒圖庫倫歸化城等處。各設首領喇嘛。首領之下。各設德木齊一名。○又題准。後黃寺每年誦經喇嘛班第。定為四百名。○又題准。喇嘛班第等。為人所召。誦經治病。必向首領言明。限定日期。若私往。及違限。或擅宿人家。或借端留婦女於廟者。照律治罪。除院冊有名喇嘛外。不許添設。外來私行喇嘛班第等。亦不得擅留。違

者。治罪。○十七年。題准。歸化城喇嘛等。有事往厄魯特喀爾喀處去者。俱具題請往。都統不時稽察。不許妄為。厄魯特喀爾喀往來人。及喇嘛班第等。不許擅留。違者。治罪。○十八年。給喀爾喀丹津喇嘛

勅印。○康熙元年。題准。外藩蒙古察哈爾游牧蒙古諸人。欲令家人為喇嘛班第。及留各處所來喇嘛班第。皆開寫數目送院註冊。違者。治罪。凡隱喇嘛班第。不載入冊者。以隱丁論。○三年。題准。盛京四塔。各設首領喇嘛一員。格隆班第。各十七



名。○五年題准喇嘛等使往達賴喇嘛處擅帶彼處喇嘛班第來者從重治罪。○六年題准喇嘛格隆等許服金黃鵝黃大紅等色班第等許服大紅色餘人不許擅服。曾被

上賜者各色俱准服。若違禁服用者大喇嘛罰牲畜一九。班第以下鞭一百。○十年題准湯古忒處喇嘛非奉

旨不許輒來。○十一年題准內王等取充後黃寺班第一百八名額缺將默爾根綽爾濟額外冊內有名班第頂補。若無額外冊內有名班第仍行

禮部於各主下取人補充。逃走自歸者革去班第。交還原主。○十三年給喀爾喀扎薩克阿海代清台吉

勅印。○十六年題准扎薩克首領喇嘛給與印信。其餘喇嘛班第等給與禁條度牒。

盛京西勒圖庫倫歸化城首領喇嘛亦給印信。部冊有名喇嘛班第給與度牒。外藩四十九旗。每旗各設首領喇嘛一員。給與度牒。○二十八年議准喇嘛庫土克圖各送班第十名。准照後黃寺班第例。三年給衣一套。每月給與米肉茶油



等物。○又覆准。番經場太監。除年五十以上。七十以下者。仍准容留外。年少太監。永行裁革。其廟。撥學誦經典格隆班第等二十名居住。揀選一名爲首領。俱令隆善寺大喇嘛管理。錢米衣服等項。照妙應寺例賞給。○三十二年。覆准。達賴喇嘛。自伊祖顧實罕以來。敬謹納貢。今達賴喇嘛復來進貢。給與

勅書。○四十二年。扎薩克大喇嘛奏請原籍鞏昌洮州衛所屬卓鼐克忒廟。改建大寺。以便集衆誦經。其廟東有官地。每年交糧六石者。懇祈

恩賜奉

旨。以民田展脩廟宇。有關民生。嗣後凡脩廟礙民房地者。著永行停止。○四十八年。

諭。喇嘛每說念經可救生靈。凡爲爾等念經殺牲供食者。豈非生靈。爾等若能不食。並傳內外寺廟衆喇嘛。俱照此例。一年可活二三十萬生靈。如此。乃合喇嘛之道。爾等會議具奏。京城喇嘛張家庫土克圖阿王。巴爾柱爾庫土克圖阿王。扎木素格隆等。遵

旨議准。嗣後凡進

內廷念經。及佛生日。朔望等日。與凡往人家念經。



俱停止食肉。傳知

盛京。五臺山。歸化城。察哈爾八旗。西安等處。衆寺廟住持喇嘛。一體遵行。○五十一年。

諭。聞鄂爾多斯六旗阿木島及桑額斯巴等處。行劣之喇嘛甚多。欺誘蒙古。侵占產業。該王台吉等。供養伊等。行邪左道。不念下人窮苦。差大臣二員往查。將此等喇嘛緝拏至京。發給江南。杭州等處。駐防兵爲奴。卽用六旗窮人緝拏。如能拏獲。將所拏喇嘛牲畜。賞給窮人。恐喇嘛聞知。逃進口內。著理藩院。知會寧夏。橫城等處。有出入邊口者。卽令拏獲。交與往查官員。

○六十年。覆准。京城喇嘛自扎薩克大喇嘛以下。格蘇爾班第以上。共九百三十八名。每日應給茶油鹽柴麵煤炭等項。以各物時價折算。一年共銀一萬三千一百七十五兩有奇。移咨戶部。照前給衣服折銀之例。每兩扣銀一錢。每十兩扣銀一兩。按小建閏月。增減給與。○六十一年。議准。喇嘛諷經時。設立大格斯奎四人爲主。規秩比副首領。○雍正元年。議准。裏野烏齊喇嘛阿王查布陳勒庫土克圖。給與封號。

勅印。○三年。題准。洮岷地方阿木島喇嘛等。以治病



消災爲名。誑騙蒙古。行文該扎薩克嚴查。如果治病有益者。該扎薩克保留。其餘一槩逐回原籍。嗣後若有隱藏事發。將扎薩克一併議處。

朝貢

國初定。歸化城土默特二旗。每年四季貢馬一百匹。緞一百疋。○又定。給有信牌使人。邊外得乘驛馬。宿處准給食物。不給食物者。罰牛一頭。不給驛馬。罰牲畜三九。故意驚散馬羣者。罰一九。無信牌。冒索驛馬食物者。拏送本院治罪。扎薩克貝勒貝子公等。宿處不給食物者。罰牛一頭。非扎薩克貝勒等。擅支食物者。罰馬一匹。○順治二年。題准。歸化城土默特二旗。四季貢馬一百六十三匹。免貢緞疋。○十二年。題准。喀爾喀



八扎薩克。每年進貢白駝各一匹。白馬各八匹。照例各賞給銀茶桶茶盆蟒緞緞布等物。○十三年。題准。厄魯特達賴汗等使人還者。給驛馬二十五匹。馬車十二輛。其帶來馬駝。每宿處給與草料。至西寧止。○十四年。題准。歸化城二旗。每年進石青二千觔。○康熙七年。題准。喀爾喀進貢之使。與厄魯特之使同來。令厄魯特之使首坐。喀爾喀等使接坐。其次令鄂爾多斯之使坐。台吉等之使來。令各按旗坐。○八年。題准。厄魯特喀爾喀進貢之人。經由何旗斥埃。該旗斥

埃官領催兵丁等。卽爲護送。轉交相接之旗。至張家口。俟院遣往接官員。交訖。准回。違者。治罪。若途中強行換買馬駝者。護送官兵。拏送本院治罪。○十七年。題准。外藩各旗。庶人。冒稱台吉進貢者。鞭一百。罰二九。驍騎校。冒稱佐領進貢者。革職。罰三九。同來台吉。知情冒賞者。革去台吉。罰五九。○二十年。題准。厄魯特喀爾喀來使。不令同日行禮。○又題准。厄魯特喀爾喀來使。遇

萬壽。元旦。冬至。令厄魯特在右翼。喀爾喀在左翼行



禮。○又題准。凡冒取出邊信票。往接厄魯特喀爾喀等處之人。詎取進貢物件。或將貢物沿途貨買。及進館後。進貢未畢。先自貨買。而擅爲通事者。係旗下人。柳號三個月。鞭一百。其家主係官。罰俸六個月。係庶人。鞭八十。佐領。驍騎校。罰俸三個月。領催。鞭五十。係民。柳號三個月。責四十板。該管官。罰俸三個月。總甲。責二十板。護送官。及看館官。失於緝獲。各罰俸三個月。領催。兵丁。各鞭五十。進貢事畢後。本院派出官員。筆帖式。監視貿易。其有洩漏內事者。照光棍例治罪。

○二十一年。題准。厄魯特喀爾喀等人謝

恩。不得過二百人。若來者衆多。分爲數次。○二十二年。題准。厄魯特噶爾丹。進貢使臣。有印憑者。許進內。其噶爾瑪等四台吉使人。無印憑。亦准進內。皆不得過二百人。餘者。令在張家口歸化城貿易。○二十八年。題准。

聖駕巡幸後。行文張家口總管。如遇喀爾喀小台吉使臣等。照常放入。其扎薩克諾顏大台吉等。不必令其前來。或有所賚奏。亦待稟報到院之日。行文前去。照驗放進。○又



諭喀爾喀具題前來之使。嗣後著張家口駐防官員帶  
進。○三十二年覆准。達賴喇嘛歷年來使。從人多至  
數百名。嗣後使人至西寧關口時。令西寧總兵  
官查明人數。註冊報部。其本處差往喇嘛人役  
亦應裁減。倘有隱瞞數目。多帶人來往者。治罪。  
又覆准。鄂羅斯察汗漢奏文。與外國奏文式  
不合。貢物奏文。一併發回。伊國地遠。不知中國  
事例。將奏文不合式處。明白教諭來使。引  
見時。照常

恩賜。其帶來貨物。仍令如前貿易。鄂羅斯自請定邊

界後。來使不絕。與往年不同。凡奏文納貢行禮  
謝

恩等儀。俱定例永遠遵行。嗣後察汗漢奏文。先著黑  
龍江將軍開看。若有不合式處。卽自邊地發回。  
驗明合式。方令入奏。到京奏  
聞之時。令來使於

午門前跪捧置黃案上。行三跪九叩頭禮。凡遇年  
節。冬至。與各喜慶

陞殿日期。令鄂羅斯人。在衆官後行禮。首領使人。坐  
諸執事後。其有頂帶人。俱令坐鑲藍旗之末。



賜茶及引

見賜食時。令行三跪九叩頭禮。將首領使人。坐頭等侍衛前。內大臣後。其餘有頂帶人。俱令坐頭等侍衛後。此行禮之處。令一通使。傳達言語。立於贊禮官傍。至食畢。令行一跪三叩頭禮。退。永著爲例。○三十四年。

諭。土默特効力甚苦。嗣後馬鹿雀鷹等貢。永行停止。○三十五年。厄魯特台吉策妄阿喇布坦來使。所帶販貨人等九十六名。奉

旨。准其帶至甘州貿易。著地方官員看守。勿致爭競。嗣

後策妄阿喇布坦來使。許帶三百名來京貿易。○四十三年。議准。外藩五十旗分台吉等。一年一次進貢外。如有情願來貢者。准其進貢。該扎薩克將台吉等職名貢物。開載印文。進口時。該旗員查明人數貢物。亦用印文。差綠旗步兵賚送。其扎薩克印。交查館官員。詳勘呈部。令照進貢例安插。○五十六年。覆准。行文邊口官員。外藩台吉等進貢人入口時。查明貢物。卽用印文。交步兵賚送。不得遲延勒索。如違。交該部嚴究議罪。○雍正元年。議准。土魯番愛西拉拉伯克土克



圖遣使進貢。著伊使臣隨蒙古王台吉等。引見王台吉行禮畢。另為一班行禮。○又議准。元旦策妄阿拉布坦來使。在朝鮮國來使後第三班行禮。

賞給

國初定。凡喀爾喀厄魯特汗台吉喇嘛等卒。遣大臣侍衛及本院官員往祭。○又定。賞歸化城進貢官員。裘帽帶靴弓箭鞍轡銀兩。○順治十年。題准。喀爾喀投誠人。封親王郡王公者。賞裘帽帶靴盔甲弓箭鞍馬緞布皮張銀器有差。隨從大臣亦分別給賞有差。○十四年。題准。後黃寺誦經喇嘛。每年賞銀一千兩。由戶部取給。○十八年。題准。來投喀爾喀人。遣還時。按時給與衣帽靴襪等物。冬時添狐皮端罩。無馬者給馬一



匹。○康熙四年。題准。喀爾喀投誠人。封貝勒貝子。及一二三四等台吉者。各賞裘帽帶靴盔甲弓箭鞍馬緞布皮張銀器有差。隨從人員。亦分別給賞有差。○七年。題准。投誠人。觀其較射。分爲四等。賞給人口衣帽帶靴。及房地器皿牛馬鞍轡有差。○三十年。題准。飛呀哈畢席克圖屯頭目厄席爾滾博穆都屯頭目闖奇努。歸順進貢。照例賞末等蟒緞披領袍各一件。○又覆准。喀爾喀多羅貝勒。初次請

安進貢。賞給漆鞍馬一匹。銀茶盆一個。狐皮裏蟒袍一件。染貂帽一頂。鍍金鞋帶連小刀手帕荷包一副。頭等斜皮淨面靴。及緞襪各一雙。緞十五疋。毛青布一百五十疋。○三十一年。

諭。喀爾喀王貝勒貝子公台吉等。初次進京引見者。仍照原賞喀爾喀例賞給。其後再來者。俱照四十九旗例賞給。著理藩院存案爲例遵行。○三十三年。題准。喀爾喀和托呼特之根敦代青。初次請

安進貢。照三十年賞多羅貝勒例賞給。○又喀爾喀王等。與四十九旗年例朝覲。奉

旨。凡來請安。適逢元旦者。王貝勒貝子公台吉等。俱著



一例賞給。○五十二年。覆准。休窩姓波卓泥玲佳努克貧姓戚平阿恩多姓松結達等。納貢貂皮。照例將此四名頭目。各賞末等蟒緞披領袍一件。○雍正元年。

諭。策妄阿拉布坦來使布債等。各賞緞四疋。藍布二十四疋。從人各賞彭緞二疋。藍布八疋。○又諭。郭爾羅斯乏食。白都納倉糧頗多。卽將此米散賑。但止給與米糧餬口。並無產業。何以爲生。向者給產業買牲餼之事。俱派富戶。富戶苟且塞責。所給蒙古之物。浮報數倍。蒙古並不得實惠。科爾沁一

旗。與其他蒙古不同。

太祖高皇帝時。首先臣服。且爲朕

皇曾祖妣孝莊文皇后

皇祖妣孝惠章皇后之母家。世爲國戚。恪恭異順。歷今百有餘年。今聞伊屬下之人乏食。朕心軫惻。著卽動用正項錢糧三萬兩往賑。再派出大臣一員。司官一員。往郭爾羅斯旗下。將實在窮苦。並無牲餼之人。查明數目。按伊戶口足用之數。給與乳牛羊隻。○五年。

諭。聞索倫達虎里等處。兩年馬匹牲餼。多有倒斃。豐



欵不一。兵丁生計稍艱。著動戶部庫銀五千兩。交  
總管副都統與將軍公同商酌。養育索倫窮苦之  
人。及賞給効力兵丁。○又

諭。今年口外蒙古地方。雖然豐收。但科爾沁敖漢等  
十六處札薩克地方。聞得收穫未甚豐盛。此等旗  
分。宜加特恩。科爾沁地方五旗。著賞銀三千兩。此  
項銀兩。著交與現今在京科爾沁王等帶去。將科  
爾沁土謝圖親王等處五旗。未能豐收者。查明賞  
給。敖漢等十一處札薩克地方。著賞銀六千兩。此  
項銀兩。爾衙門可派司官二員。分兩路帶去。會同

各處札薩克。將未能豐收者。查明賞給。



理刑清吏司

國家之待外藩也。立制分條。期於寬簡。不易其俗。而歸於仁厚。功令如左。

刑例

國初定。邊內人在邊外犯罪。照內律。邊外人在邊內犯罪。照外律。八旗游牧蒙古蘇魯克人等。俱照外律治罪。○又定。凡罰以九論者。馬二匹。犍牛二頭。乳牛二頭。犏牛二頭。騾牛一頭。以五論者。犍牛一頭。乳牛一頭。犏牛一頭。騾牛二頭。○又定。凡王等審理已決之事。復行控告。覆審無



冤抑者。罰告人一。九。扎薩克貝勒貝子公等所  
審者。罰告人一。五。官員所審者。罰告人馬一匹。  
○又定。凡罪已審結。本人不告。旁人代訴。罰馬  
一匹。給原審人。○又定。有罪應罰牲畜而言無  
有者。三。九。以上。擇令旗內大臣立誓。一。九。以下。  
擇令佐領內立誓。○又定。民家結婚。聘禮。准給  
馬五匹。牛五頭。羊五十隻。踰數多給者。入官。聘  
定後。婿故。准取還聘禮。女故者。取還聘禮之半。  
聘定之女。婿憎嫌不娶者。不准取聘禮。○又定。  
庶人在王前。明出惡言者。罰給三。九。扎薩克貝

勒貝子公等。罰給二。九。台吉。罰給一。九。雖非面  
言而審實者。一例治罪。詬罵大臣者。罰給一。九。  
副都統。罰給七頭。叅領。罰給五頭。佐領。罰給三  
頭。○又定。扎薩克王等所遣人。貝勒等擅責。罰  
三。九。庶人擅責。罰一。九。○又定。外藩蒙古買人  
出邊。永行停止。○又定。歸化城二旗。不許賣漢  
人男婦子女與未降外國。○又定。外藩蒙古。以  
他日爲歲朝者。係王。罰一。九。扎薩克貝勒貝子  
公等。罰七頭。台吉等。罰五頭。庶人。罰馬一匹。給  
出首人。○又定。不設十家長者。王。罰馬十匹。扎



薩克貝勒貝子公等罰馬七匹。台吉罰馬五匹。  
○順治四年題准。科爾沁十旗違禁遣人向黑  
龍江等處買貂皮者。係王罰九九。扎薩克貝勒  
等罰七九。台吉罰五九。往貿易人爲首者。斬。餘  
各罰三九。攜帶之貲入官。迎往貿易者。槩罰三  
九。貲亦入官。○八年題准。外藩蒙古人有訟。赴  
各管旗王貝勒等處伸告。若審理不結。令會同  
會審旗分之王貝勒等審。仍不結。王等遣送赴  
院。如未在王等處伸告。越次赴院者。一槩發回。  
○十四年題准。休妻者。妻帶來之物見在者。一

槩給還。○十五年題准。外藩蒙古人。身歿無子  
者。令其兄弟承受家產。舊給該管主。今不准。○十八年題

准。外藩蒙古人。身歿無嗣者。生前曾將族中兄  
弟之子。具保向各扎薩克王貝勒貝子公等言  
明撫養者。准其承受家產。若抱養棄子。他姓之  
子。家奴之子者。不准承受家產。生前未立嗣者。  
家產令近族承受。無族中兄弟之子。生前在王  
貝勒等處稟明。將異姓之子撫養者。亦准承受  
家產。身歿後。見有同姓人。而其妻撫養他姓者。  
不准。如撫養妾生子爲子者。其生子之妾。不得



嫁賣。如嫁賣不准爲子。無近族。亦無他姓養子。其家產給該管王貝勒貝子公台吉等。○康熙元年。題准。擬定死罪監候秋後犯人。照刑部例會同九卿議奏。○九年。題准。凡已結事件稱有冤枉者。仍赴本院告理。又稱冤枉。許赴通政司鼓廳告理。○十三年。題准。庶人在非扎薩克貝勒貝子公台吉塔布囊前。明出惡言者。照扎薩克例。罰給牲畜。○又題准。喀爾喀厄魯特湯古忒巴爾虎等處。私遣人往貿易。遣人探親。出斥埃迎往貿易。招攬貿易者。係王。罰馬一百匹。貝

勒貝子。公等。罰馬七十匹。台吉等。罰馬五十匹。都統。副都統。革職。罰五九。叅領。佐領。革職。罰三九。驍騎校。革職。罰二九。其領催。十家長。鞭一百。罰一九。貲財入官。爲首貿易之人。絞。籍其家。餘各鞭一百。罰三九。貲財入官。如斥埃人不行緝獲。被人首發者。官員。革職。籍其家。兵丁。鞭一百。罰三九。半入官。半給出首人。令赴願往旗分。○又題准。非扎薩克貝勒貝子公台吉塔布囊等有罪。照扎薩克貝勒等一例議處。○十四年。題准。凡審定死罪犯人。扎薩克王貝勒等。在附管



扎薩克王貝勒等處說明。審過處決。不與附管  
扎薩克王等說明。審過處決。以私殺論。會集所  
審死罪人。卽於會集處處決。○十五年。題准。凡  
死罪。不令王貝勒貝子公額駙立誓。於本旗內。  
擇令台吉塔布囊立誓。若立誓。准死罪人以九  
九馬匹贖。○十八年。題准。台吉等擅與喀爾喀  
厄魯特人婚姻來往者。革去爵級。不准承襲。所  
屬人。全給其近族兄弟。除妻子外。家產牲畜俱  
入官。所屬人隨往者。各鞭一百。罰三九。將所屬  
人女遣令隨嫁。女父不向扎薩克王貝勒處說

明者。鞭一百。所遣送嫁屬人不自說明者。亦鞭  
一百。失於覺察之斥埃官員。革職。籍其家。兵丁  
鞭一百。罰三九。若將所遣送嫁人誤以爲逃人  
解院者。扎薩克王等。罰五九。○二十二年。題准。  
凡外藩蒙古人。誘賣內地人。及買爲妻妾奴僕  
者。爲首人。擬絞。解院送刑部監候。秋後處決。爲  
從人。鞭一百。罰三九。止一人者。以爲首論。誘賣  
蒙古人。及買爲妻妾奴僕者。爲首人。立絞。餘照  
前例。串誘買賣者。鞭一百。罰三九。被誘人。鞭一  
百。○二十四年。題准。喀爾喀進貢人。違禁有罪



者。大事。照內例治罪。小事。行文該扎薩克處。令送所罰牲畜。○二十六年。題准。旗分貝子。於行大禮處失儀。酌議罰馬五十匹。○又議准。食俸蒙古王貝子公官員等。凡治罪者。停罰牲畜。照伊所坐之罪罰俸。永遠爲例。○又題准。王以下至閒散人等。違禁與喀爾喀厄魯特湯古特巴爾虎等貿易結親。照定例治罪。其四十九旗協理旗務人等。及歸化城二旗都統等。至閒散人等。量其品級治罪。歸化城都統。副都統。管理索倫總管等。各罰馬五十匹。副總管等。各罰五九

牲畜。盡行入官。佐領以下至小領催等。十家長。有亂行者。俱照治外藩蒙古例治罪。○二十七年。議准。喀爾喀入克西克騰哨地。奪人財物。其奪物人。該台吉查明追贓議處。其疎曠哨地之驍騎校。革職。鞭一百。罰牲畜三九入官。兵丁。各鞭一百。○二十八年。議准。喀爾喀台吉從人。在庫爾奇勒地方。違禁放鎗游獵。將該台吉。罰牲畜五九入官。放鎗人。鞭八十。○三十一年。覆准。喀爾喀等。人衆事繁。當使各知法度。亦照傳諭四十九旗例。每扎薩克。各給律書一部。○三十



三年覆准。山海關外科爾沁土默特等旗。凡偷盜爭奪等事。舊例俱由

盛京刑部行文。著理藩院會審。往返定議。方得完結。凡干連人等。守候往來。遲延日月。寒暑疾疫。爲患。嗣後揀放。應陞蒙古旗員一員。筆帖式二員。往

盛京居住。除係人命要事。確審取供。咨部具題外。一應小事。卽會同

盛京刑部審結。其有口外扎薩克會審。并與該將軍會審之事。俱令一併審結。不致遲延。○雍正

二二年。議准。蒙古人告狀。必列姓名。方與准理。若誣告者。原告及見証。罰三九。



人命

國初定。外藩蒙古王等。故殺仇殺死各屬下人。及家奴。罰馬四十匹。貝勒貝子公等。罰馬三十匹。台吉等。罰三九。給死者親屬。旗內聽所欲往。若無仇隙。誤傷致死者。首明情由。將所罰入官。死者親屬不准開出。○又定。射斫家奴。或割截耳鼻者。王等。罰牲畜五九。扎薩克貝勒貝子公等。罰四九。台吉等。罰三九。庶人。罰一九。○又定。外藩蒙古鬪毆傷人。致成殘疾者。罰牲畜三九。得愈者。罰一九。傷孕婦致胎墜者。罰一九。打損人



大清會典 卷一百一十二  
牙齒者。罰一九。斷人髮及帽纓者。罰五頭。用拳及鞭桿打人者。罰五頭。互打者。無罪。○又定。燠野獸穴。以致失火者。罰一九。給見証人。延燒致人死者。罰三九。給死者之家。餘誤失火者。罰牲畜五頭。給見証人。延燒致人死者。罰一九。給死者之家。延燒死牲畜者。照數賠償。○又定。射斫人牲畜致死者。如數賠償外。罰一九。係馬加倍償與。不致死。罰慘牛。○順治十五年。題准。夫故殺妻者。抵絞。○又題准。鬪毆傷重。五十日內死者。抵絞。○康熙五年。題准。射斫家奴。割截耳鼻者。凌遲。○十三年。題准。官民人等。失悞傷人致死。有人見証承認者。罰給三九。若無見証可疑者。擇令該旗內人立誓。若立誓。罰給三九。不立誓。抵絞。○又題准。官民人等。與妻鬪毆誤傷致妻死者。罰三九。給妻家。妻有過犯。不行首告。擅殺死者。罰三九入官。○又題准。蒙古王貝勒等。故殺仇殺。謀殺他旗人者。除償人外。王。罰馬一百匹。貝勒貝子公。罰馬七十匹。台吉塔布囊。罰馬五十匹。給死者妻子。係庶人。抵斬。除妻子外。

致死者。以故殺仇殺論。○六年。題准。家奴殺主者。凌遲。○十三年。題准。官民人等。失悞傷人致死。有人見証承認者。罰給三九。若無見証可疑者。擇令該旗內人立誓。若立誓。罰給三九。不立誓。抵絞。○又題准。官民人等。與妻鬪毆誤傷致妻死者。罰三九。給妻家。妻有過犯。不行首告。擅殺死者。罰三九入官。○又題准。蒙古王貝勒等。故殺仇殺。謀殺他旗人者。除償人外。王。罰馬一百匹。貝勒貝子公。罰馬七十匹。台吉塔布囊。罰馬五十匹。給死者妻子。係庶人。抵斬。除妻子外。



家產牲畜。亦給死者妻子。○又題准。塔布囊等  
殺死屬下人。及家奴者。照台吉例罰。係都統。副  
都統。罰三九。叅領。佐領。驍騎校。罰二九。庶人。罰  
一九。俱給死者妻子。併其兄弟。俱令出旗。誤傷  
致死者。向扎薩克處說明。若無仇隙。不准出旗。  
所罰入官。○又題准。官民人等。挾仇放火。致人  
死者。係官。絞。庶人。斬。致死牲畜者。係官。革職。庶  
人。鞭一百。除妻子外。家產牲畜。悉給被害人之  
妻子。○又題准。官員射斫家奴。割截耳鼻者。罰  
二九。致死者。以故殺論。

賊盜

國初。定。失去牲畜。過三日。向附近扎薩克處稟明  
緝獲。若不稟明緝獲。每頭匹罰羊一隻。亡失牲  
畜。冒稱已有者。罰三九。錯認取者。罰一九。因無  
失主。隱匿者。罰一九。輒騎亡失牲畜者。罰一五。  
○又定。亡失牲畜。路人擅自收留者。以盜論。○  
又定。出首盜賊可疑者。令盜賊立誓。不令出首  
人立誓。○又定。窩隱盜賊者。王。罰九九。扎薩克  
貝勒。貝子。公。罰七九。台吉。罰五九。台吉為盜者。  
罰七九。若事發不承認者。令其伯叔立誓。無伯



叔。令其伯叔之子立誓。○又定。夥隱盜賊不首者。王罰三九。扎薩克貝勒貝子公。罰二九。台吉罰一九。○又定。凡駝馬牛羊一人盜者。不分主僕。絞。二人盜。斬一人。三人盜。斬二人。衆人夥盜者。爲首二人。斬。餘俱爲從。鞭一百。罰三九。家奴偷盜。鞭一百。追取所有。無可追者。於其主名下。加倍追取。籍沒爲首人妻子家產牲畜。併爲從人所罰牲畜。俱給失主。○又定。凡偷盜駝馬牛羊。情有可疑者。令立誓。若立誓免其罪。不立誓。照前例治罪。其妻子家奴免籍沒。追取所有。有牲

畜。併向該管主。罰一九牲畜。給與失主。○又定。賊已發覺。王等不行拏解。以致疎脫者。以窩盜論。○又定。盜財物者。除照數賠償外。所盜財物。值驂牛以上價。罰三九。值羊價。罰一九。以下。罰犏牛一頭。○又定。盜賊未至十歲者。不以盜論。○康熙元年。題准。台吉官員等。攜家擅出斥埃。遊牧。及窩隱偷盜。喀爾喀馬匹賊人。擅責喀爾喀人。劫奪馬匹什物者。革職。家產籍沒。從往人。各鞭一百。斥埃官員。革職。罰三九。兵丁。鞭一百。都統等官。不知情者。免議。所沒家產。及罰物。給



大清會典 卷一百二十二  
喀爾喀失主。其妻子不准給。取贖價與之。○二年。題准。死犯逃脫者。收管官員。罰三九。驍騎校。革職。罰二九。領催。鞭一百。兵丁。鞭八十。若脫逃。不係死犯者。官員。罰二九。驍騎校。罰一九。領催。鞭八十。兵丁。鞭五十。逃犯若被旁人捉獲。卽以所罰給捉獲人。如無捉獲人。給扎薩克王貝勒等。○四年。題准。外藩蒙古各旗佐領下有爲盜者。罰該佐領。二九。驍騎校。一九。領催。七頭。十家長。鞭一百。罰一九。一佐領下有盜二次者。佐領。革職。罰二九。驍騎校。革職。罰一九。領催。鞭一百。

罰一九。十家長。鞭一百。家產籍沒。一叅領下有盜三次者。叅領。罰三九。一旗下有盜三次者。管旗王貝勒貝子公等。各罰五九。都統副都統。各罰三九。所屬人偷盜者。該王貝勒貝子公台吉塔布囊。各罰三九。庶人家奴偷盜者。罰其主一九。王以下。若能嚴查所屬。將爲盜人拏解者。免罪。仍給所罰之半。若失於稽查。被他旗人拏獲者。都統以下。所罰併給之。王等所罰。入官。八旗遊牧蒙古察哈爾人爲盜。被獲二次者。該管官。罰三九。副管官。佐領。各罰二九。驍騎校。領催。十



家長等照外藩蒙古治罪。蘇魯克人爲盜。其頭目亦照佐領治罪。盜賊或被失主捉獲。或被旁人捉獲。卽送該扎薩克王貝勒貝子公官員處。王等卽撥人。併失主。捉獲人。解院。○五年。題准。衆人爲夥盜。劫喀爾喀馬匹等物者。除照例治罪。如數賠還外。共罰給一九。所餘家產妻子。入官。若喀爾喀人。將失物多捏謊報。令其爲首人立誓。若立誓。照數賠給。不立誓。止照見在之數賠給。若喀爾喀人爲夥盜。劫內地馬匹等物者。爲首一人。斬。二人。斬一人。餘各鞭一百。罰該管

主一九。移文令其送至。○六年。題准。捉獲盜賊。不解院。私議完結者。以盜論。所罰物給出首人。管旗王以下。至十家長。一併從重治罪。○十三年。題准。凡明行搶劫者。係王。罰馬一百匹。貝勒貝子公。罰馬七十匹。台吉塔布囊。罰馬五十匹。行劫殺人者。罰馬外。頂替賠人。以兵器傷人。致成殘疾者。罰馬外。仍以身價之半給二九。官民人。行劫殺人傷人者。不分首從。俱斬。妻子家產籍沒。不曾殺人傷人者。爲首二人。絞。妻子家產籍沒。爲從者。各鞭一百。罰三九。若止一人。鞭一



百。籍沒家產。免其妻子。二三人者以一人爲首。餘爲從。所罰沒俱給失主。○又題准。台吉等親身爲盜者。革去爵級。追取所屬人。免沒家產。○又題准。發掘王貝勒貝子公等墓者。爲首一人。斬。妻子家產籍沒。餘各鞭一百。罰三九。發台吉塔布囊墓者。爲首一人。絞。餘各鞭一百。罰二九。發官員墓者。爲首一人。鞭一百。罰三九。餘各鞭一百。罰一九。發庶人墓者。爲首一人。鞭一百。罰一九。餘各鞭八十。罰一九。罰沒家產牲畜俱給墓主。○又題准。刦奪死罪犯人者。不分首從。俱

斬。刦奪罪不至死犯人者。爲首人。罰三九。餘各罰一九。○十六年。題准。在邊界禁地。偷竊刦奪者。被獲。管旗王貝勒等以下。併該管主。嚴行治罪。若不獲。治所入汛地。該管旗王貝勒等罪。兼令賠償竊奪之物。○十七年。題准。旁人捉獲盜馬賊者。所籍沒家產牲畜。以二分給之。一分給失主。○又題准。外藩蒙古王公主郡主等家人。旗人。偷向禁地採參者。爲首人。斬。妻子家產牲畜。併所獲俱入官。爲從者。鞭一百。家產牲畜。併所獲入官。免其妻子籍沒。公主郡主王以下。台



吉塔布囊以上遣家奴往者各罰九九都統以下驍騎校以上遣家奴往者俱革職領催十家長另戶之主遣家奴往者鞭一百革去領催十家長各罰一九所遣家奴本身及妻子家產併牲畜所獲俱入官遣另戶人往者管旗王以下十家長以上俱照遣家奴例治罪另戶人及家奴偷採該管人併各主不知者俱鞭一百罰三九偷採參旁人首發者其參入官交戶部折半價給出首人私買賣者係蒙古鞭一百罰一九內地人交刑部○十九年題准邊禁等地方劫

盜者巡察官兵緝拏時如抗拒卽斬不曾抗拒被獲者果係賊盜俱斬妻子家產牲畜籍沒給與失主不係賊盜其餘擾亂邊禁者爲首一人絞除妻子外家產牲畜籍沒餘各鞭一百罰三九內地人出禁地劫盜者官兵拏獲照內律治罪如內外官兵失於覺察或失主或旁人捉獲者內地官革職鞭一百折贖外地官革職罰三九內外兵丁各鞭一百盜賊之主知而不舉被旁人出首者以窩盜治罪出首人令赴願往旗分若出首情虛係官革職罰三九庶人鞭一百



大清會典 卷二百二十二  
罰一九。○二十二年。題准。外藩蒙古人。入內地。爲盜者。事發。量賠所盜物。其妻子家產牲畜籍沒。及所罰。一併入官。○二十八年。覆准。喀爾喀投誠人。撥在哨地內居住。嚴禁所屬人等。搶掠偷盜。犯者。照律例正法。此外有先奉

旨。撥住哨地內之人。劫盜事覺。亦照例治罪。○三十年。遣官五路分查蒙古各旗佐領內貧人。奉

旨。前蒙古等處。盜賊稀少。今乃日見奏聞。良由窮困所致。且彼攜妻挾子前來。若盡行收留。彼無遺類矣。彼首領沉湎於酒。不恤人民生死。朕邊口所積糧米。屢

賑貧人。俱已罄盡。今爾等往會同彼屬王貝勒等。及耆老輩。計議。作何長久營生。使貧人得所。不致邊上流亡。確議具奏。遵

旨。覆准。衆蒙古王貝勒以下。耆老十戶長以上。謹遵

恩旨。嚴行曉諭各旗。嗣後俱擇好水草處游牧。輕役減稅。務求永遠營生之道。今先查明窮人。著本旗扎薩克。及富戶喇嘛等。撫養不足。則衆旗公助牛羊。每貧台吉。給牛三頭。羊十五隻。每貧民。給牛二頭。羊十隻。俾各餒養孳育。永作生理。勿爲盜賊。亦不致流亡。取具衆旗承領養贍貧人數



日印結。一併交理藩院存冊。倘後有以貧窮告部者。照冊將該管扎薩克議處。其假告貧窮者。從重治罪。○四十四年。

諭。聞蒙古緝盜。盜俱投喇嘛藏匿。嗣後喇嘛等。如將罪犯容留。查出一體治罪。著爲例。○又覆准。蒙古等野外游牧。竝無墻垣。但倚牲畜爲生。地方盜賊屢有殘害。將旗員發往扎賴特旗分。與扎薩克等加意料理。如有盜賊。著嚴行查緝。又蒙古半居綽爾河外。半居河內。相隔地方甚遠。無專委巡捕盜賊之員。嗣後於每翼派出官兵。按各翼形

勢地方安置。令其嚴查。○又

諭。此數年口外偷馬之事斷絕。今又有盜。殊屬可惡。將此從賊人等俱解進京城。給與大臣之家爲奴。○又覆准。偷馬從賊。仍留在外。必復爲賊。應將伊等本身妻子及正法首賊之妻子。在逃首賊之妻子。俱解內務府。其疎脫賊之驍騎校。俱著帶至京城。當苦差行走。○又覆准。扎賴特旗分居住喀爾喀人爲盜。旣經拏獲。卽著差往稽查盜賊官員。會同該扎薩克貝子等。詳取口供。定議咨部。○五十一年。



諭鄂爾多斯聞有盜賊。差大臣二員往會同扎薩克等嚴行察拏。審得實情。卽在彼處正法。但審賊時。須公正執中。不必因朕有嚴旨。行法過甚。○雍正元年。諭偷盜一二牲餼。卽將蒙古立絞。人命重大。嗣後應定擬絞監候之罪。爾等遵旨暫行一年。與往年盜案相較。若蒙古從此盜案漸少。則照此例行。倘蒙古無知。法輕易玩。而盜案比往年較多。則仍照原定之例擬罪。

軍法

國初定。派令出兵規避者。王等罰馬一百匹。扎薩克貝勒貝子公。罰馬七十匹。台吉。罰馬五十匹。率全旗俱不往者。軍法按治。期約處。一日不至者。王。罰馬十匹。扎薩克貝勒貝子公。罰馬七匹。台吉。罰馬五匹。遲悞幾日者。按日罰取。○又定。出征將

禁馬騎瘦者。王。罰馬三十匹。扎薩克貝勒貝子公。罰馬二十匹。台吉。罰馬十匹。○又定。出征圍獵各處。不俟衆先回者。王。罰馬十匹。扎薩克貝勒



大清會典 卷三十三  
貝子公罰馬七匹。台吉罰馬五匹。隨從人罰取所騎馬。○又定。越境遊牧者。王罰馬十匹。扎薩克貝勒貝子公罰馬七匹。台吉罰馬五匹。庶人罰牛一頭。○又定。越已所分地界。另行遊牧者。王罰馬一百匹。扎薩克貝勒貝子公罰馬七十匹。台吉罰馬五十匹。庶人。本身併家產俱罰給見証人。○又定。凡鄰旗有兵侵。而不全率所屬甲兵。速集議征者。王罰馬一百匹。扎薩克貝勒貝子公罰馬七十匹。台吉罰馬五十匹。○順治三年。題准。得出征人遺失馬駝各物。及逃人者。

俱收養送還。隱匿不送者。以盜論。○康熙五年。題准。擅以甲冑弓矢兵器。賣與喀爾喀厄魯特等。及給親戚者。王罰馬一百匹。貝勒貝子公罰馬七十匹。台吉塔布囊罰馬五十匹。若係庶人爲首者。絞。家產牲畜籍沒。爲從者。各鞭一百。罰三九。半給出首人。半入官。出首其主者。許出戶。蒙古人來京。不向本院陳明。私買兵器帶往者。王等罰三九。台吉塔布囊都統副都統叅領佐領護衛官員。各罰一九。庶人鞭八十。○十三年。題准。外藩王貝勒貝子公台吉塔布囊等。遇敵



交鋒。他旗敗遁。一旗王貝勒等力戰。有裨於他旗者。將敗遁之旗一佐領人丁。給與力戰之旗。他旗俱戰。一旗敗遁者。革去爵級爲庶人。將人丁盡給力戰之王等。若一旗內一半攻戰。一半敗遁。將敗遁王貝勒貝子公台吉塔布囊等。革去爵級爲庶人。人丁盡給本旗力戰之人。如一旗內半旗無計前進。半旗攻戰敗遁。將敗遁王貝勒等。革去爵級爲庶人。人丁盡給本旗無罪王貝勒貝子公台吉塔布囊等。其力戰之王貝勒貝子公台吉塔布囊等。各賞給。若各旗未及

準備。一旗王貝勒貝子公台吉塔布囊。已得準備攻戰。視其功之大小。獲之多寡。給賞。凡曠野攻戰。王貝勒貝子公大臣。不按隊伍。輕入敵陣。或見敵兵單少。不行問明。擅自奔馳者。將所乘之馬。并本次所獲人口入官。凡列陣攻戰時。須從容縱馬。各照對敵前進。若不照對敵前進。尾附他隊。或離本伍入他伍。或他隊俱進。立視不前者。各按所犯治罪。行兵之際。有一二人離伍搶掠被害者。將妻子入官。該管官治罪。失火者。斬。不許拆毀廟宇。不許妄殺平人。抗拒者擊。投



大清會典 卷二百二十二  
順者撫。其俘獲之人。勿得剝取衣服。拆散夫婦。至不堪俘獲者。亦勿得傷害剝取衣服。俘獲之人。勿令看守馬匹。凡出征王貝勒等。務平定地方。救濟生民。嚴禁官兵。不許搶掠。不許陷害良民。平定之日。陞賞。若縱兵搶掠。指良民爲賊。妄行殺戮者。從重治罪。與敵人相敵。正合戰時。有將落馬之人。救出與馬騎者。係公以下。副都統以上。給馬十匹。叅領阿達哈哈番以下。給馬六匹。庶人。給馬二匹。俱於落馬人名下追給。○十五年。題准。派出從征官員。規避者。革職。罰三九。

交於該管王等。仍令披甲。押赴軍前。○十九年。題准。外藩蒙古四等台吉以上。遣往管兵陣亡者。照都統例。給陣亡優卹銀兩。陣亡中傷殘疾。病故官兵。賞卹等項銀兩。俱照內例給與。○雍正元年。

諭理藩院。傳旨與追剿厄魯特之王貝勒貝子公台吉侍衛暨兵丁等。爾等一聞厄魯特潛遁。俱各親率兵丁。奮力追剿。誅斬擒獲。無一漏網。甚屬可嘉。爾等皆因感戴。

聖祖皇帝仁恩。所以爲朕抒誠効力如此。況賊人無多。





爾等尚且親率兵丁追勦。如遇大敵。其必努力前驅。更不待言矣。爾等忠誠。朕已深悉。甚為欣悅。凡効力之人。著查明具奏。朕將特加恩賚。將此諭旨繕寫。交與來京之護軍領催等齎回通行傳諭。○

又

諭。綽木聘等逃遁。本屬小事。蒙古人等。凡遇之者。俱各不顧身命。努力追擒。伊等感激。

皇考覆育深恩。竭誠仰報。朕覽奏章。為之墮淚。嘉歎不已。將此旨繕寫發與。令將効力人等查明具奏。毋使一人遺漏。朕將加以特恩。



大清會典卷之二百二十二

文政三







